



Gall y llys wneud Gorchmyn Cymorth Teuluol neu Orchmyn Monitro sy'n ei gwneud yn ofynnol i Cafcass Cymru gyngori a chynorthwyo yn y broses o lunio, gwella a chynnal trefniadau plentyn, neu fonitro'r trefniadau hyn. Prif flaenoriaeth y llys fydd lles y plentyn, ac ni fydd y llys yn gwneud gorchmyn oni fyddai gwneud gorchmyn o'r fath yn fwy buddiol i'r plentyn na pheidio â gwneud gorchmyn o gwbl.

## Beth yw Gorchmyn Cymorth Teuluol?

Mae gorchmynion cymorth teuluol (GCT) yn orchmynion y bydd rhieni a/neu ofalwyr wedi cytuno y gall y llys eu gwneud. Os bydd y llys yn gwneud GCT, bydd yn gwneud hynny fel arfer ar ôl iddo benderfynu gyda phwy y bydd y plentyn yn byw ac yn treulio amser (gorchmyn trefniadau plentyn).

Mae GCT yn rhoi cyfarwyddyd i Cafcass Cymru roi cyngor neu gymorth i'r bobl a enwir yn y gorchmyn ynghylch llunio, gwella neu gynnal trefniadau plentyn. Gall y llys wneud y GCT os bydd o'r farn na fyddai rhieni neu ofalwyr y plentyn yn gallu rhoi eu trefniadau ar waith yn llwyddiannus heb i Cafcass Cymru fod yn rhan o'r broses.

Gall GCT bara hyd at 12 mis, ond bydd llawer o'r gorchmynion hyn am gyfnod byrrach, er enghraifft rhwng 3 a 6 mis. Rhaid i bob unigolyn a enwir gydsynio â'r GCT. Y llys fydd yn pennu hyd y GCT a gall roi cyfarwyddyd i Cafcass Cymru gyflwyno adroddiad i'r llys pan ddaw'r GCT i ben.

## Pryd y caiff Gorchmyn Cymorth Teuluol ei argymhell?

Rhaid i'r llys ofyn barn Cafcass Cymru cyn gwneud GCT, er mwyn trafod a fyddai gwneud gorchmyn o'r fath er lles pennaf y plentyn, sut y gallai weithredu ac am ba hyd.

Dim ond os bydd ymarferwyr Cafcass Cymru o'r farn bod angen cymorth neu gyngor, am gyfnod byr, er lles y plentyn ac er mwyn i drefniadau'r plentyn weithio y byddant yn argymhell GCT.

Cyn argymhell GCT, bydd yr ymarferydd wedi siarad â'r oedolion a, lle y bo'n briodol, y plentyn, er mwyn cael gwybod eu barn. Bydd yn fodlon y bydd pob un o'r oedolion yn gweithio'n unol â chynllun y cytunwyd arno sy'n cynnwys nodau clir, sy'n canolbwyntio ar ddiwallu anghenion lles y plentyn ac sy'n debygol o lwyddo.

Gallai ymarferwyr Cafcass Cymru gyflwyno'r argymhelliad hwn mewn adroddiad i'r llys neu gallai roi ei farn yn ystod gwrandawriad llys.

## Beth fydd yn digwydd?

Bydd ymarferydd Cafcass Cymru yn llunio cynllun clir gyda'r oedolion a enwir sy'n canolbwyntio ar anghenion a lles y plentyn ac sy'n nodi

- Y materion y mae'r GCT yn anelu at roi cymorth yn eu cylch, a sut y bydd hyn o fudd i'r plentyn

- Y camau gweithredu a fydd yn helpu'r teulu i lunio, gwella neu gynnal y trefniadau ar gyfer y plentyn
- Pwy sy'n gyfrifol am ba gamau gweithredu
- Ym mha ffordd a pha mor aml y bydd yr ymarferydd yn cysylltu â'r bobl a enwir yn y GCT a / neu'r plentyn i drafod eu cynnydd
- Unrhyw gyfarfodydd a gynhelir fel rhan o'r GCT
- A fydd adroddiad neu adolygiad ar ddiwedd y GCT.

## Pwyntiau pwysig i'w nodi

Mae gorchmynion cymorth teuluol yn rhoi cymorth byrdymor i deuluoedd lunio, gwella neu gynnal y trefniadau plentyn a nodir mewn gorchmyn trefniadau plentyn. Eu nod yw gwella sefyllfa'r plentyn.

- Nid yw GCT yn addas ar gyfer rheoli trefniadau plentyn sy'n achosi risg neu sy'n anniogel
- Nid yw GCT yn ffordd o geisio rhoi trefniadau ar waith na chawsant eu gorchmyn gan y llys neu na chytunwyd arnynt gan y plentyn a'r oedolion dan sylw
- Nid yw ymarferwyr yn goruchwylio amser teulu fel rhan o'r GCT, nid ydynt yn ymgymryd â gwaith stori bywyd na gwaith therapiwtig gyda phlant nac oedolion.
- Mae Cafcass Cymru yn gweithredu o ddydd Llun i ddydd Gwener ac nid yw ymarferwyr yn rhoi cyngor na chymorth y tu allan i oriau gwaith arferol.

## Beth yw Gorchmyn Monitro?

Gall y llys wneud gorchmyn monitro, sy'n rhoi cyfarwyddyd i Cafcass Cymru gadarnhau a yw person yn cydymffurfio â gorchmyn trefniadau plentyn. Gall y gorchmyn monitro bara hyd at 12 mis. Gall y llys ofyn i Cafcass Cymru gyflwyno adroddiad i'r llys yn ystod cyfnod y gorchmyn monitro neu ar ddiwedd y cyfnod hwnnw.

Nid oes angen i'r llys gael cytundeb y rhieni neu'r gofalwyr er mwyn gwneud gorchmyn monitro.

## Beth fydd yn digwydd?

Bydd Cafcass Cymru yn gwneud trefniadau gyda'r oedolion dan sylw i fonitro cydymffurfiaeth â'r gorchmyn trefniadau plentyn. Fel arfer, gwneir hyn drwy un alwad ffôn neu fwy.

Bydd Cafcass Cymru yn dilyn y cyfarwyddiadau a wnaed gan y llys o ran sut i roi gwybod i'r llys os na fydd y person sy'n cael ei fonitro yn cydymffurfio â'r gorchmyn. Fel arfer, gwneir hyn drwy ysgrifennu adroddiad byr i'r llys.

## Pwyntiau pwysig i'w nodi

Rôl Cafcass Cymru yw monitro cydymffurfiaeth â'r trefniadau ar gyfer y plentyn, fel y'u nodir yn y gorchmyn trefniadau plentyn.

- Nid yw Cafcass Cymru yn gyfrifol am lunio trefniadau na hwyluso trefniadau
- Nid yw Cafcass Cymru yn rhoi cyngor na chymorth fel rhan o orchymyn monitro
- Mae Cafcass Cymru yn gweithredu o ddydd Llun i ddydd Gwener ac nid yw ymarferwyr yn monitro cydymffurfiaeth y tu allan i oriau gwaith arferol.